

四庫全書

集部

欽定四庫全書

集部  
拙軒集卷二

詳校官起居注主事臣顧崇泰

主事臣呂雲棟覆勘

謄錄貢生臣章松雲

謄錄監生臣鄭啓緒

欽定四庫全書

集部四

提要

張氏拙軒集六卷

別集類三宋

臣等謹案張氏拙軒集六卷宋張侃撰侃字直夫其事蹟不見於史乘据集中自稱淮海則當為揚州人而自寶祐維揚志以下記廣陵人物者從不能舉其姓名獨錢溥秘閣書目載有張拙軒初稿四冊焦竑國史經籍志

有張侃拙軒稿四卷而宋藝文志書錄解題俱無之宋人江湖前後諸集及近時選錄宋詩者亦多未之及則其湮晦於世盖已久矣今永樂大典各韻內尚頗載其詩文或題拙軒集或題拙軒初稿勘驗標目與錢溥焦竑所記並合當即其書惟其人無可考見今即集中謝樓監丞為其父作行實一書反覆參核盖侃即開禧中知樞密院張巖之子也案

宋史巖以叅知政事進筦樞密督視江淮軍  
馬書中稱其父訐謨兩社出董戎師歷官既  
已相符又巖附和韓侂冑用兵敗衄御史劾  
其朋姦誤國奪官而書中謂其父惟主於和  
以靖國家或者不之察極力詆毀云云其言  
皆為父辨白益足與巖事相證史又稱巖家  
本大梁徙揚州紹興末渡江居湖州考集中  
歸來詩有結亭菰水旁句江淮錄跋中亦有

吾家近西塞語知其卜宅吳興尤為確據至  
其生平宦蹟雖不盡詳以其詩文考之則嘗  
監常州犇牛鎮酒稅遷為上虞丞尚畧見大  
槩巖以諂媚權姦致位通顯為世詬病而侃  
獨志趣蕭散浮沉未僚所與游者如趙師秀  
周文璞輩皆吟咏自適恬靜不爭之士故所  
作亦多清雋圓穩時有閒澹之致雖未能開  
闢門徑自成一家而其集久佚僅存實為世

所未睹謹排訂編次釐為六卷俾言宋詩者  
猶得以知其名氏焉乾隆四十六年九月恭  
校上

總纂官

臣紀昀陸錫熊

臣孫士毅

總

校

官

臣

陸

費

墀





欽定四庫全書

張氏拙軒集卷一

宋 張侃 撰

詩

積雨嘆

去年南蘭陵官河無流漸陰雲久不見萬里行炎曦太  
守為民禱百拜躬愈祇忽然動涼颼驟雨肆奔馳旱苗  
有生意下民免寒饑感格在俄頃嗟人自不為頌語我  
欲作垂世同曹規深恐旁觀者憑藉立是非反謂地勢

隆水散及四支縱使雨入尺立待只片時今年芒種後  
有雨細如絲農家買五兆寸波成漣漪我耳曾聽得把  
筆紀小詩又傳練湖圯瀕洞南北迷浸淫到旁邑原隰  
不分畸秋中月色皎老晴頗相宜深谷傳地籟喬松難  
扶持滂流盡三日處處同一辭化工有至理淺眼休蠹  
窺蝼蛄可憐生短衣到鳬跖冬寒與夏暑平日何怨咨  
一旦示灾咎反已深思惟退寸望求尺龠合規微貨豐  
艱非逆料人情恣生疑既忻堆如櫛復話禾無稂遂致

陰陽轉未免水旱移固窮不羨富求足翻成虧不知尼  
父言三年積銖銖一稊與二米猶勝糠覈肥農家多守  
分富家當坦夷

秋後一日書所見者

秋深山轉清雨定水自綠庭前牽牛花粲粲悅人目居  
官已年餘竟日書吏牘因閒窺化工景象不一足促織  
汝何為懶婦絲斷續夜長清未眠題詩燒短燭

紅塔詩

出門看青山天際晴雲合此松植長塗亭亭兩紅塔誰  
知百年後竟坐市塵雜老僧隨世機電眸閱伏臘流水  
洗不盡就下汙流納北窓稍幽虛清風滿眠榻

觀海

孔聖道不行乘桴浮于海非子深寓言誠欲警不逮我  
生遊江湖汎舟聽自在有時月初生滿天雲去變今朝  
到海邊潮遲立可待固知源脈長下藏魚龍隊想見景  
清明間亦露光彩因尔觀自然天地能主宰

雨

今日天欲雨農家名分龍雨意或羞澁霑潤限西東入  
夏雨已多頗覺支體慵輕煙冉冉綠夕照微微紅不奈  
勃姑語呼雨雲滿空乍晴絲捲軸復闌花無蹤良辰偶  
孤負土脈方豐融屈指是新秋細聽鄰杵春

冬夜對月

秋來月漸清老火猶未退好風送新涼雲深復昏晦徐  
思此夜滿豈不令人愛暑氣薄前榮蒸溽肯少貸月色

到芳池綠此亦拘礙今宵坐中庭揮麈成獨對霜華雜  
月色頓然清病肺何必泥中秋此語吾永佩

午步積谷山探梅才有一二藥

爛雨才放晴街頭泥三寸支筇積谷山寒梅微弄粉二

十四番風

廿四風梅居  
首棟花居末

迎臘先一訊青女素精明竟不

易號令譬如蛻骨仙色粧而意整惟有吟詩翁年年來

管領

發犇牛

紅添花滿溪綠帶草穿石佳致在目前遠近記經歷雲  
疎雨漸收篙長水倒激平生一詩卷未免寫胃臆記得  
坡翁言在郡六百日出處雖不同我性聊自適

桃花瀾鵝

畫工天機高腕有萬鈞力把筆解寫生妙處欠人識地  
深煙自引雲歛望不極誰知只尺間卷藏樓座側挑枝  
糝淺紅羞帶燕支色經時歎芳跼數片墮晴碧政綠景  
色饒詎恐光陰擲波心自在流夕照苦見逼雌蜂不受

形容此雙鵝鵝睨目且裴回暫收西去翼籠寬終難馴  
水滿好脩飾旁人莫癡心乘勢事箭弋庶幾久相忘飛  
浮欣得得連旬暑送風對此融胃臆不必形似求枉費  
半圭墨

新河

侵晨發金臺停午泊新河風定雨新霽一段平青羅遠  
烟牽新景宿鷺行細莎臨流洗塵心此地今幾過官事  
記蒲鞭少駐聽漁歌大哉濬汲功萬古保不磨



晨起

青山與白水足以娛人思麗花與佳禽足以令人悲因  
思世上事感觸特一時拘拘守定見年少紛白絲朝來  
北窻邊天清雲不飛桂樹充綠潤其色光陸離靜坐息  
萬慮手攜淵明詩飲酒得真趣神氣常自怡我飲僅涓  
滴螺杯謾爾持後山草木深有禽擇所栖婆餅為誰焦  
姑惡為誰咨騷翁繹楚語解說累千辭萬物雖異性天  
地同一機時至乃飛鳴人訛反生疑禽語空啾唧有怨

難窮推好生毛羽者細聽強誑欺遂使本然質由是深  
有虧清風到階庭處處禽語奇勿問聲如何天地何曾  
私

杜門詩

初官金臺邊日長頗閒暇細賡飲酒詩喜無俗子駕雲  
輕月緩梳竹少花相亞官塘頗塵囂數間名傳舍吾身  
聊自適閱世如啖蔗春初汎舟回晴谿山影射蒼苔護  
魚池粉牆旁花架東風知人情游絲從空下歷覽佳有

餘頃刻在所化杜門觀我心陶冶有鮑謝

府治關鎮越堂得坡翁詩石於草棘間

功名蚊成雷文華珠媚川作意每中輟要當付自然誰  
知蠅頭表不似詩句傳鑑湖生光彩坡翁真謫仙

記野人語

野人延我坐古木陰四垂未語涕先集昔盛今全衰我  
聞野人語斯事古有之但要存心地何須問墓師

歸來五首

小圃近吾廬呼奴掃堦曲梅株晚放花谿水新圍玉聲  
名不厭低出處今已熟倚杖看城山飛來兩鳴鶴

西閨景色妍歸來春未盡岸淺柳生陰風緩花成陣  
懽娛垂白親免得望家訊乳鷺立簾鉤別久還相認

薔薇在其西老桂在其東先後不同時生毓歸元功幽  
艷占淑景清香待秋風有句莫漫與騷然固長窮

爽氣滿清晨秀色藏山骨結亭茗水旁斷手建已月古  
語敬書紳高譚休拄笏柴扉喜常關從今避請謁

醪醖數尺長伐木成小架玉色映晚春濃陰接初夏濁  
醪任淺深細草堪枕藉興來信步行浮雲出山罅

書目所見者五首

我家屏圍圖畫作江天雪雪晴行漁舟蒲帆繫檣絕猶  
記為兒時劍立從頭說今日親見之甚欲伴清潔

淺灘潮未到小舟不得動當時一羽輕今成千鈞重老  
翁倚篙竿生寒肩勢竦勸翁且歸家潮來勝乘槎

盟鷗何處來聲和春喜近賓鴻可憐生呼羣摩霧隱鷗

鴻本何心世人無義襟責彼不責己嗟嗟非獨今

羣山恰四圍江潮游其中潮低不成山豈是阨於風舟  
行山漸遠潮勢同領建抑之可使高又作望崖反

小民海濱居煎水活妻孥指海充府庫何曾計有無鹽  
成有喜色摘蔬供午食君子勞於心我儂勞於力

朱陳嫁娶圖

生男願封侯嫁女在比隣此是古人言最知天理真世  
遠人亦偽嫁娶來城闉歲序罕聚首浩渺不計春當其

出門時錯落車百輪笙簫填孔道珠翠委泥塵堂開壯  
丹屏盤橫水精鱗徒取眼前富未問身後貧女嬌鮮禮  
法薄夫貽所親民家女及嫁擇對走跋跋一旦有其家  
昕昏如主賓誰圖朱陳村宜為堯舜民

嘉定壬午春晚園官送杞菊因取陸天隨蘇東坡張南軒三賦誦之感事賦詩

我志甘澹薄不為物所遷園官送杞菊秀色滿目前生  
育秉至性陰陽順中權可憐黃口兒七筋照腥羶縱得

一餉戲旁觀成脅肩杞菊付中厨試著薑鹽煎至哉天  
下味妙處祕不傳三賢留雋語首當師之焉

秋日閒居十首

歸來清淨居懶蹋紅紫陌有堂新翼然遠景疑界畫暑  
氣礙秋容似覺眼界窄墨雲吹雨絲頃刻入地尺水勢  
沄沄來岸流已拍拍老楊涇根翠穉菱汙花白東港與  
西塍了不見舊迹陰陽反掌間底事作災厄

名花逢深春各自逞嬌怪薔薇繞籬根園丁采去賣瑣



細不知名結束擔頭挂細細隨輕風時時與破壞詩人  
浪自吟放言竟成癡紅紫一夕空又見韶華邁亭亭珊  
瑚枝懶入名花派每見天秋涼依竹堪入畫

我志甘鋤園汲水敢言倦擬種百尺松終宵風雨戰土  
脈分瘠肥秉性有後先蔚然三寸長荆棘從旁甯待得  
成清陰方為世人羨畫手知姓誰拂拭好東絹寫此歲  
寒姿爽氣滿庭院不記少小時插秣泥樣賤

秋崖一段清秋水暗生池眼力所盡處不特宋玉悲化

工爾許巧閒花糝枯枝涼生細細吐月緩重重垂但恨  
古之人未能鑄好辭從叟悲秋語如石不可移獨愛白  
樂天酌酒細吟詩漸喜無人聽格外只自知

西闔近邑郭閒地素來廣規度三五弓栽花屹相向第  
一覓竹本宗生要易晔晚色翠四圍依約見秋嶂老雞  
先司晨除柵試一放峨冠汙枯草鮮明莫能狀厨人出  
新巧收勲到盆盎持送文園翁小字書佳况

江南多澤國別派亦成湖渺渺明佳景紛紛展畫圖層

穹邈無際浮翠前峰孤欲喚扁舟去筆牀茶竈俱東邊  
嶼深幽穉蘆不記秣花輕相上下隨風掠酒盃湖中開  
一鏡中有雙野鳬可憐知者少此趣未嘗無

人情易愛憎品花語最嚴遮護富貴花排日掛牙籤驕  
態不自持霏微花上霑虛名竟何益餘事付寶奩花開  
有遲速稟氣等洪纖到眼俱可翫何曾形弃嫌幽幽牽  
牛開碧色照疎欄勿云此花陋所取緣傷廉

迎秋花事稀蝶翅依沙晚籬落繞紅園暗遣佳名損立

名豈願醜一定不容迂寧避市塵喧甘作山林遯桑枝  
綴鳳兒欄外成錦憶婉婉風味殊冉冉煙光遠治世鳳  
朝陽吾道何須偃毋學接輿狂終日空思忖

蘭以深而香避世非吾恐移根植堂下遂使世人艱誰  
知秋華拆未許流聲盡即之色漸溫佩之芳愈敏因觀  
太古音試理幽蘭引幽蘭本香草名隨四時泯奈何楚  
子孫些只徒自窘一枝三四葉與人作標準

蘭芷荃蕙  
本是一種

香草名隨四時改焉不特春有

蘭秋有蘭春有蕙秋有蕙也

小園雖偏仄堂成春告殘羣山當目前翠色煙中繁隔  
隄多垂楊紛紛風前翻畦夫為予言宜插秋牡丹既無  
傾城艷亦可酒筵看根株雖脆弱千葉攢中單夕陽媚  
晴水紅濕回輕瀾休從殷七七染法成欺瞞

五雲門外湖田詩

越中官賦重有田即追呼小民生計薄何以存妻孥前  
賢念民切瀦水啟鑑湖自此歲常登不計大有書湖堙  
水漸涸往往事耕鋤禾根雖浸水天秋翠平鋪后王主

生育詎肯餒一夫盡說湖田好大勝行商車商車利縱博巨  
濤與險涂湖田若不熟明年豈全無

娥江市

前回渡娥江夜半呼舟行今回渡娥江風迎晚潮平人  
心險於潮潮頭平於路娥心無古今潮隨漁篙渡

千秋觀拜賀知章像

天清雲捲幔風定水開奩既知鑑湖濶所取胡乃庶一  
曲期自足千年名字馥我來拜遺像端可激頽俗

遊石筍

偶成石筍遊山色浸雲表兩輪天地濶一覽江湖小  
渴飲金沙泉饑餐翠松苗鄴公何許人遙想好風標

郊外

縣市已蕭疎何況在西郊浮雲不成山濁雨平淺坳  
紛紛占生殖蓋頭一把茅釣魚尋竹枝明火采松梢翻成  
水墨畫極意竟難描移時反官舍遊僧初解包潛思目  
所寓肯把聲名拋試問耳聾許終勝掉頭巢

閒意

秋來纔幾日得雨洗暑氣庭前容人行  
瑣細開野卉似覺氣象殊鄙薄牡丹貴  
不是怨春風政緣出處異柔得千年存  
剛則片時易彈指秋又深靜處覩萬景  
胡床倚竹根清入詩人胃好風緩緩來  
側耳聽絡緯

樊將軍廟在上陌樊宅土人相傳是將軍故居  
史本傳云沛人也五十年前因題數語今輒附  
此



將軍生沛邑樊宅在吳墟既沒其先語決知非此居排  
門忠尚在浮甲事尤虛却恐同姓者相傳佚本初

古澗閒適

雨來礪水碧礪遠山勢斜礪邊隨意坐瑣細覓開花野  
蝶深有情翩翩依沙晚以渠流水心醒我觀花眼

示韋中實六首

鶴隱乍來時年方三十七忽忽十七年終始如一日卜  
居在邑西近我讀書室閒來劇笑談友情似膠漆筆端

備六體紙上春蛇逸兩鬢吹秋絲吟詩紀經歷

去年金臺歸今年三十六守拙伴林鳩折箭存飛鵠小  
園接屋東有堂依水綠浮雲前山來蕭放忘拘束雲已  
久無心細看猶未足起來一杯酒從此覓歸宿

我與鶴隱交一紀又踰五燕飛知春秋雞鳴便風雨惟  
君勝蘇端許我似杜甫忘情更忘言握手見肺腑君或  
醉時歌不問歌差誤醒後頗快人續續寫詩句

向來未服役君室日清閒侵曉披衣見中宵曳杖還溪

梅粲玉萼幾度開笑顏邇來君累重旬月旅長安葛屨  
跣塵沙春在湖山間忙裏買小艇何妨卧看山

一春隨意行濟勝欣有遇不愁風薄人但愁雨深阻亂  
山煙中藏勃姑聲轉唳春無三日晴前人句已寓惜許  
好花枝爛熳少人顧君久不在家花思依柳絮

微官當力勤後月已戒路思君且話言處處放閒步花  
前借鶯吟卷中笑魚蠹民家老樹根小憩覓幽趣更後  
四十年同君尋舊寓斯事姑置之尺書寄飛羽

示高愷叔

天秋桂子香我舟從西來愛君丰度好面上無塵埃相逢各草草未暇開情抱贈君以一言功名薄穹昊新春雪初晴記水三四程徘徊梅花樹邀我了詩情

題李伯時馬

近代李伯時能畫天厯馬畫本出心匠不在韓幹下真骨獨當御汗血沫凝赭為渠生光輝神妙非力假平日熟意態繪事頗閒暇誰知贗易真萬馬悉喑啞色帶碧

雲駟

馬名梅聖俞都官有碧雲駟集

和鸞亦雅雅一筆竟不予此意識

者寡

### 三高祠

武侯出師表子陵釣魚磯達則濟天下窮則歛所施淒涼數間屋荒草碧離離功名挂人口毀譽復隨之槎舟三高堂快讀石湖碑不有君子生何以立國基夫君守定見遯野身自肥儻不為時用猶當師仲尼血指恐及已旁觀付盛衰汎湖誠偽計思鱸設虛辭區區務力作

反蒙樵人譏松江水不窮那能洗瑕疵石湖擬小山三  
招何逶迤字字春秋筆史氏當憑依武林有西湖湖上  
水仙祠君復隱孤山清名敵伯夷死無封禪書小詩揚  
京師坡翁刺是邦寒泉薦江蘺在郡六百日遂踵居易  
規終焉配水仙事定分是非邦人思坡翁要和甘棠時  
遂肖三賢像相與祝其尸三賢得其操三高得其微篙  
師催我行日落江水湄

惠山

勝槩棄道旁翠色空蕭爽泉經古澗流鳥趁枯藤上俗  
眼眩浮華紅妝圍翠幌入山恐太深更肯契心賞山靈  
亦退聽佳名慮標榜斷綆汲寒深隨人墮世網

煎茶詩

結廬枕石隙其下通泉脈新開數尺泉涌然如乳白道  
人北山來閒話到終夕徐云茶已芽氣味及高格絳囊  
映綠色未嘗齒流液汲泉滿欵甌篝火勿遽迫須臾蟹  
眼生茶新手緩擲薑鹽宜屏除祇能添水厄

一作薑鹽  
亞屏除莫

令添  
水厄

東西家

東家機杼鳴西家舂杵急西家荷艷鮮東家竹翠濕小  
小了生涯四壁從渠立昨朝雨傾盆雞柵又新葺拓葉  
延涼陰父母妻兒集村南沽酒歸佳饌有魚入

對鏡辭

古人對鏡辭率是年紀老出言反成悲未免耿成抱間  
有少年人對鏡默祈禱第一早功名第二多壽考第三



欲富貴滿屋貯珠寶此心機械生此身晨夕惱用一每  
藏九終焉乖至道目為守錢虜名字亦可保不見王夷  
甫舉去忘稽攷我今對鏡別有酒便為好欲醉未醉間  
浩歌出晴昊荷花解人心風前互傾倒

秋夜

秋深氣轉清夜間更正永庭前菊半花天外雲收景試  
呼麴生來綠色照瓦血悠然兩相忘何必問形影

十月二十四夜雪霰用蘇文忠和趙號令韻

營居在西關鍊句誰能和水深舟已行雨驟雲無奈殘  
花蝶倦棲弱柳鳥驚墮橋杆掛稻頭小定事春簾帶濕  
芒盡除易破粒漸瑳世路久羊腸人情隨蟻磨每祈天  
雨寶非是心好貨力行毋自畫浮言空相挫因閒到農  
家暫憩同客坐別港野鳬歸斷籬牛卧老翁語殷勤  
今歲多坎坷望晴眼力枯護田衣袂浣政恐官稅虧不  
顧茅屋破老翁勿預愁太守兼勸課丘明紀大饑孟子  
憫人餓瑞花舞綵綵來秋真可賀

戊辰春二月雪呂君國秀曾賦七字句予和云  
試來月下逢僊子何似風前聘宓妃乙酉春二  
月一日雪再吟二首

去年正月尾雲片綴雨絲今年二月頭雪花一尺團豐  
登有定數元化孰可窺呼奴粲燈篝細誦辛卯詩

呂君年八十曾賦春雪詩平生慕韓愈大書萬玉妃我  
時年甫冠辛苦鑄好辭功業只爾耳歲序空推移

孤山

先生聲名高引人同吾道來訪孤山師草木富華藻有  
泉出山罅碧色巧縈抱甚欲酌此清仰天應笑倒

寫古五首

事行人所難塗人未深信吾身一時高佳名萬古振堂  
前頗幽虛老竹漆翠潤世俗日澆訛風流今已盡

文章如元氣又如水赴川宿習務洗去仲涂當日賢扶  
持正統在後學承其傳衆目不可掩璣衡麗青天

東帶立朝廷平日有定力挺挺道鄉公面上無佞色諫

書與天通那暇顧荆棘墓祭記學宮賢哉太守職

人心具天性嗜好各不同荒涼陸子祠寒泉引碧簫名  
者身之累千載存遺蹤獨有吟詩人時來繫短蓬

希聲少年日勁風盤青蒼與世既不偶投老願山旁  
花靜天理濬泉發新芳斯事古亦有君子戒反常

清寒

臞叟久不出短帽半離披天公有新事剪雪玉叅差仰  
瞻銀海眩須臾肆寒威試呼緘口翁

酒器名

時復一中之

初如蒼筤飄終似白練馳陰氣無所泄乘風舞綏綏山  
明失紫翠手板休拄頤磳流有層氷艇子寸步移寒禽  
集深條可憐翅翎垂擁爐回陽春始覺溫四肢我生僅  
再見老農重嗟咨錦里杜子美姑溪周紫芝文章江漢  
流初不事支辭遺編可推究古豈異今時無此雪與寒  
何翅五噏詩宜瑞不患寡寫檄誅雲師

杜云太古以來  
無此雪周云太

古以來無此寒王龜齡  
洪景廬有五白倡酬

書事

細雨饑寒色忽被北風吹楊柳絲不長免得成別離西  
家杼錦繡東家粥文辭天地本無巧人世嗟何為

今年氣候遲五月寒尚在花柳已稀疎軒窗頗瀟洒提  
攜一書篋轉盼十五載自拂蛛蝥去文字生光彩名起  
致人嫌俗冗令我浼袖手細旁觀小大立可待樵夫唱  
竹枝漁人歌欸乃清適付儻來浪語免後悔吾家儒代  
耕官卑謹勤怠入夜傾碧香聊用澆磊塊

歲時書事

官居盡日閒隨意自消遣出門河水清風定回長練煙  
林入畫圖脫葉霜新絢景色為人妍一歲知幾變因思  
天地間是處堪留戀指隨襟袖寒地氣近淮甸歸來吹  
青燈峨冠看經傳今人聊復爾古人不可見

牆東古楊樹秋來已憔悴非無歲寒心政以枝條脆陽  
春敷新榮生育不擇地依依楊柳枝風前舞嬌翠嬌翠  
雖至柔中有生生意

夜長何漫漫誰為勞者辭致身清明朝誰為感遇詩古



來賢達士氣志不肯卑曳裾非素習不過祈人知一言  
偶相契遂踵蕭何規嗚呼令不然車馬日以馳朱門極  
富貴長途多寒饑立身榮辱中每見無不為平生毅然  
節反為今所虧報顏度朝夕同隊如小兒結茅枕吳羌  
清名萬代垂

束髮能綴文未解知其奧脩綆汲淵源所得是潢潦年  
來三折肱逢人漫稱好古意愈簡淡新說恣顛倒如何  
十日曝只望陰雨膏閉門觀天功時至學自到

霜色白皚皚與雪竟無間不獨齊國人凌晨歌甌飯古  
瓦燦奇葩纖微分六瓣雲寒曉不開雖有孤鴈猶記  
前十年躡烏青螺綰舒徐酌細泉委折登危棧獨恨來  
倉卒野服未易辦去年買小舟斂板作微宦荒涼屋數  
椽門外多車轍旋呼市居人摘葺如縫綻寂坐冬夜深  
霜風吹兩鬢舊書不敢廢官事不敢慢達哉漆園翁出  
處任鵬鷖

朝來瑞花飛簷前成箇箇老農村中居沽酒自相賀不

願擔石儲但願免饑餓連年田有秋牆東添石礎春來  
亦有花竹外江梅破倡桃與妖李臨風自嬌惰上天新  
賜瑞莫測花機大毫端已先知浩歌續楚些

冬雪已飛舞冬月愈明皎午夜靜人籟一目天未了荒  
村木杈枒上有烏鵲繞胡床擁破裘呼奴取青醪良夜  
天下同妙處識者少何必與人言壯志出塵表

前朝到牖南水開春意動寒風先感發日色尚曛暈老  
翁禮頗恭側立手先拱殷勤謝官儂筠籠野果重顧我

守官下仁惠愧劉寵其位偏而卑惟知短檄捧舉袖謝  
老翁毋以斯言恐我見誠暖妹我才甘散冗

心官素坦夷幼荷父兄詔口誦太古篇煙村雜漁釣誰  
知賢者樂竟坐旁人譙偶有百鍊銅鑄作架上照形模  
雖不同小大亦相肖一為世所移作事非素料酒中有  
妙理勿學淵明笑淵明曠蕩人行藏同荷篠天外有奇  
趣勿學孫登嘯孫登隱逸輩施為異常調萬事付自然  
吾方詣至妙

歲晚星回天雪晴雨收脚畦丁昨夜來老竹如新斫我  
本一書生紙上守糟粕治圃非素長方欲求其畧吁嗟  
天下人方以鄰為壑人心自爾殊化工無厚薄

羣花極妖麗不似梅花清孤標年年在吟意年年生香  
清到詩骨可翫不可名安得李杜輩美酒為之傾

食圓用建昌使君叔父韻

荆楚遺風在瑣碎陳佳筵猶憶總州時兀坐空自憐老  
妻劑秣粉夜永燈花偏湫隘蔗漿穠晴雲繞目前翻匙

玉比潔膠齒珠相駢我髮日種種流光自年年門無送

酒人

古詩云上元應送酒來自蔡經家

誰能中聖賢因試囊中術妙處

有機權由來寓于手不在刀削圓汎觀天地間幾者物

之先大阮精詩學詠物巧回旋虛名付儻來默守終日

乾吳生泥於方所見何拘攣三復叔兮什華池水潤咽

吳伯愷食圓詩云平生五千卷為方不為圓

池荷

水淺荷亭亭風過半欹側入水元不濡須臾見本色偶

然成珠璣至妙人孰測乍散起微波再圓聊作劇瀾雨  
未舒晴浮雲時擁墨小池涵舊痕一旦寓新飾荷平綠  
水深翠滿真堪惜切勿濺成珠漾去靜如拭

楓橋

牆邊紫燕留柳外紅日晚川明山影動風緩波聲遠吾  
道付悠悠世塵空衮衮精廬傍官河時有舟車返古賢  
用志苦吟詩一字穩乃知半夜鐘絕勝木蘭飯

木蘭揚州石塔

寺舊名





欽定四庫全書

張氏拙軒集卷二

宋張侃撰

詩

薄薄酒三首

薄薄酒解愁顏醜醜婦勝居鰥但有麤繒大布包裹了  
爭羨危冠華服偃偻趨朝班就令真封定遠侯何如生  
入玉門關蘇秦富貴却輸負郭二頃管叔兄弟恨不茅  
屋三間張公厚葬保首領嵇康養生誅市闚亡羊未易

較臧穀爭地適足誇觸蠻錦衣未暖沐猴敗仙舟無耗  
鮑魚還狂謀正使鬼笑薄命豈坐天慳不須乞鏡湖三  
百里不須買蓮峰一半山窮達憂樂付與三萬六千日  
但恐一生辛苦不若一生閒

薄薄酒免厚味醜醜婦得長年淵明飲酒聊小醉醉後  
清風北窻眠季倫百萬買嬌麗一朝禍至空棄捐因思  
達者得其趣那用情愛汨心淵門栽五柳池種蓮瓶無  
斗粟囊無錢浮雲富貴不須問在世得失付自然君看

曳玉垂金趨魏闕何如躡鳥散策吳羌邊君看奇珍異  
味食方丈何如糲飯野蔴在目前古來知此亦自少或  
出或處隨吾權入秋雨過暑光薄桂子將綻添清妍抱  
甕獨醉有深樂不用抽釵喚李娟

薄薄酒無餘味醜醜婦有餘妍君看行樂且隨分不用  
美酒麗女驕目前紛紛萬事如雲過塞翁祈福圖免禍  
屈指富貴能幾人大笑書生守寒餓書生作計亦不癡  
開尊對花吟好詩醜婦買魚赤脚煮醉後狂歌發真趣

家園有梅一株依附籬落潘聖功喜具有古意  
戲占云早是江南春訊動枝頭已著兩三花癸  
酉歲梅不生花己卯秋尾聖功云亡愴然有感  
見于篇什

雪意垂垂雲滿天梅花一枝放清妍與君蹋雪看不足  
歸來吹鐙傳詩篇此詩只許梅壓倒句中染香疑登仙  
梅兮再四乞避舍香渺初不到靈堅我恐么鳳暗作崇  
嶺梅碧落侍班聯空留佳語塗耳目歲月冉冉知幾遷

况君姓氏占仙籍随分了却塵世縁想今共梅成莫逆  
投壺一笑三十年江南春訊誰領畧杖頭那用挂酒錢

千葉支子

園林綠暗花事稀蜂愁蝶怨依夕暉天工續續施巧手  
眼邊無日不芳菲須知萬物都是假苦泥實相第二機  
支花附石水清泚端莊自是蕭然姿來從鹿苑塵頓洗  
暫登螢窓聊發揮芳苞攢葉母乃密清香徐徐風作圍  
我方寂坐息百慮對此不覺板拄頤荒山草木不能嫵媚

從今細尋莫相違

園丁報秀野對岸芙蓉盛開

我家分占清溪曲溪曲新添數椽屋屋前花竹占清妍  
更植芙蓉伴黃菊植時止是三寸纔雨打雪埋地氣回  
深培淺壅那費力想見錦繡沿溪開向來為渠轉一語  
欲絆秋光堅不住于今秋光雖勝前花開却恨隔江浦  
畦丁知我酷愛花風吹芳訊到官衙淡紅深粉足嬌態  
高高下下依日斜人生行樂何須定蹉見此花頭次盛

蜂脾添蜜採偏多  
蝶婢尋香屢來聘  
因報畦丁輕削根  
趁時亂挿不厭繁  
今年開遍明年續  
要使長蒙天地恩  
主人做官在虞水  
亦有芙蓉滿閒地  
看花翻憶植花時  
酌酒一杯誰寄似

野航池邊古梅二首

池邊梅花種幾時  
枝柯古怪苔紋圍  
可憐守分不入宜  
開時却有天然姿  
因看冬夜月初上  
景象森然最難狀  
梅枝寫影已清奇  
不用畫師作圖障

凡花雖艷艷在眼梅花帶清清入骨時人喜艷不喜清  
綺言麗語寓輕忽池邊之梅格又高霜月次第上林準  
平生愛梅被梅惱梅亦憐吾非年少

對梅傲楊誠齋體

前年看梅清溪邊萬花依枝占芳妍去年看梅金臺下  
一枝傍竹秀而野今年梅花勝舊年急呼麴生來座前  
折花飲酒到夜半羌管休吹且頻看旁人笑我心太癡  
花開花落由天時如何苦作十日計慳風妬雨誰得知



我雖不言見已慣倚著茅簷聽過鴈明年梅開在清溪  
不妨訪梅西山西

連日雨

天桃倡杏羞蕊紅東風未傳第二訊忽吹山頭雲擁墨  
細聽簷牙雨成陣公堂閒寂春晝長病夫兀坐湘竹牀  
童子添火深炷香萬念不生兩相忘

久雨

浮雲四散雨意濃小池水滿不可容前度久晴今久雨

綠牋端欲問太空太空高兮渺無路風力翦絲得小住  
農家一飽庶有期笑殺春深脫布袴

連日雨意未止

前日雨聲無一滴官河不堪行小舟只因連夜雲送雨  
軒窗處處留清幽人心不同分好惡陰晴無準言妄吐  
杜陵曾賦貧交行豈是今人不如古古人今人莫預愁  
皇天念民耕西疇翻手覆手言俄頃功過只須付毛穎

遊西湖

夜來雨足半篙水西湖荷花紛錦綺扁舟載酒作清游  
香入衣襟風緩起西湖之景天下無萬句千言空滿紙  
山依華屋屋依山湖光渺渺相回環因思古人比西子  
又見今人比賢士東坡詩句脫塵凡不比今人較形似  
今時亦自有詩人毫端無窮契天理

樓攻媿比西湖為賢士

黑雲行

視西湖水閘

山頭墨雲未肯歸牖邊積水正連漪去年苦旱望甘雨  
今年久陰藏晴曦天心人意默相契雨多不止尺入地

俗諺云兩入地  
一尺歲大熟

訟風擬學韓退之深恨綠牋無好辭

### 金牛行

君不見晉陵縣北異事傳夜氣將深纔出沒古來至寶  
默有數精英之歲寧久鬱我閒試為訪遺蹤惜許邦人  
忘歲月不然上亦逼星躔兩無相合歸芒芴當時奮身  
萬策湖愛向東山穿香骨豈知服猛盡奔馳潛地而馳  
真異物雨侵古蘚滿荒臺虛名空在何有哉嗚呼金牛  
計已竭胡不犧尊陳帝闕

槎浦並海

海風顛狂衣袂摺長檣巨艦去如葉却行小立視荒田  
老翁擲杖呼妻妾成行再拜告官儂舊秋潮大經短堞  
只因鹹水入田來雖築田塍已晚哉官儂不知苗根透  
岸水浸苗望苗秀日蒸水氣反枯苗不如莫種只望潮  
自白馬湖穿夏蓋湖至後郭塘岸

連日天晴雲送雨羣山環繞翠相聚湖心波起小玉山  
映帶不多添媚嫵十年江湖寄此身每到佳處喜生津

豈知築隄限海水底事毀泐築更頻君知此理休更說  
只緣今日人心別

西溪湖

杭州西湖天下無重樓複閣成畫圖中宵與客買舟去  
千金間亦呼名姝自言此游有真樂月明星稀飛林鳥  
珍穀旨酒雜樽俎水精之鱗盤橫鋪光陰鼎鼎暗中去  
事業泯泯紙上拘蘇仙在郡情甚適君復居山身頗臞  
英風既往不可作蹤跡勝槩生荒蕪空留濃粧淡抹白

思士久泥反長吁金壘有溪名西湖我來適當夏之初  
萬荷疊疊風捲翠群山隱隱雲依梳岸頭有亭翼然立  
明秀拱挹美且都名園花卉憶靈運古洞深遠棲仙姑  
月當下弦遲開鏡高燒銀燭行冰壺君不見水利及人  
居第一為壑勿學白圭術

娥江下岸田為潮汐衝擊今不可壑小民勺水  
煎鹵于上

江潮衝田漸成地地久歸鹹有其味小民泥爐候泥乾

勺水煎鹽求淺利農家耕田望秋成煎鹽得錢盡力爭  
嗚呼小民盡力爭農家輟耒愁空生

拽碑歎

上虞溪湖十四處昔日是田納官賦逢秋民間欠灌溉  
縣官作文告后土民間以田濬溪湖田上官賦却抱輸  
閑時渚水旱時用縱未全熟無全逋古來人心平似砥  
今來人心薄于紙不念平人輸賦苦情願自為悠久計  
大臣奏事怡天顏以民為基古已然况乃民間推已有



明知食是民之天此事傳來猶未久為雨為雲翻覆手  
拽碑使平命工磨別鐫奇文垂不朽鬼神訶護屹不移  
至今碑上光陸離噫嘻人心不如石使我歎息重歎息

讀劉義門碑

邑民劉承詔十世同居熙寧中越地連旱十年承詔旁郡收米賙給

宗族趙清獻時為郡守上其事詔立義門且作記

深秋檢旱步田隄天清日懶風緩吹行行不覺筋力倦  
前山數鴈帶斜飛老農指點前頭路便是義門植碑處  
義門當日篤於親十世同居無異語可憐年遠子孫微

賴有此碑名未虧子孫能守前人志田雖一畝不忍離  
斂襟讀碑幾百字重歎今人深有愧老農耕田莫深鋤  
臺高要記義門居

夜窮歌

視梅山塘下  
搖舫等畝

山田多怕旱引水以溉灌不知雨勢狂衆流極迷漫君  
不見三鄉農一年之計一夜窮雖有人力無由逢

打魚網歎

山川信美何處無只許漁翁把茅居四時風月俱占斷

詩人琢句空長吁漁翁平生家累重得魚入市日矍矐  
裹鹽糴米了晨炊依舊尋魚波洶湧山川雖好儂不知  
只知取利他何為羣居出巧結新網名以攔江縱所施  
鯉魴未免僅出入切勿因香戀微濕破壞好景是漁翁  
不用健羨琢句工聖人設險今重險取與不取戒以漸

小雨詩

墨雲偶過雨數點萬葉辭柯霞山崦風聲怒號作新寒  
斷蹊曲港路艱險山中之民屋蓋茅豐歲往往成樂郊

分有大小隨分足旋折豆稻煨冷粥

采戠歌

采戠采戠漸綠戠山昨夜雨霑足越女提籃入市中  
論價不止金與玉開時花似蕎麥花亦能蔓生走長蛇  
龍肝鳳髓久無味却尋野戠新矜誇聲名在世多相忌  
最厭薰蕕同一器我歌采戠非虛辭采戠歌中有深意

秋蟲篇

縣樓漏鼓聲逢逢秋深夜永睡未濃窻前秋色已可掬

枕畔秋涼能暗通。偶思向來所歷事。記一忘十馬牛風。  
醒然如寤。或省起四壁。不耐吟秋蛩。秋蛩賦命抑何小。  
聲則甚大。淒而雄。艱難七月陳王業。警戒再四由姬公。  
如何秋蛩蒙好語。意謂有漸將成終。初非卒然來徑去。  
有如疾風轉孤蓬。入我牀下聲更切。恐我佐邑務纖洪。  
情知官府印窠大。不信民間機杼空。就中懶婦絲未理。  
狂謳野舞廢女紅。競言秋蛩非促織。自是合歡人不識。  
出開元遺事。綠牙作籠金作柵。萬錢爭買成戲劇。撫枕三歎。

忽成詩秋蛩秋蛩竟何為汝喙從此箱汝聲從此辭不  
平之鳴汝何預宵爾之織汝無衣自形自色雖天付我  
欲睡矣汝且住

懷仁畫龍

懷仁兩龍今幾載墨色欲盡形模在有時驅雨成波濤  
妙處暗與神明會三江七澤龍所居夜深簸弄明月珠  
為人圖畫雖左計不識憑依當殿隅世間紛紛稱畫手  
誰識懷仁是劉叟龍兮龍兮神其靈長使邦人書大有

前日昨日行

二九相喚不出手  
婦人紉衣先紉袖  
門外霜風吹倒人  
相見玉壺冰舊酒  
去年家居坐竹窻  
日陰移處梅梢長  
今年負丞在山邑  
並海寒氣非尋常  
前日昨日風四起  
頃刻凍合省河水  
鴈宿蘆花亦倦飛  
只待桃花初水肥

望雨行

去年雨多浸坤軸  
排簷日日注銀竹  
菊花已老強飄黃  
荷葉雖枯猶護綠  
今年梅雨久不來  
暑風吹乾生塵埃

苦求涓滴潤田畝敢望潏灑添酒杯昨日雨意十分好  
雨聲不斷真是寶誰知好處放些慳尚使老農惱情抱  
拙翁負丞方五旬為民致禱施殷勤飛雲漸黑開又合  
戀戀未竟林花紛

題鼠狼捕雀圖

三雀相逐枯竹低鼠狼睥睨雀高飛可憐一雀翎翅短  
天寒日暮克爾饑克作饑腸僅一飽雀雀悲鳴猶未了  
至今不敢眎枯竹揀得寒林深處宿



題禪鄉院壁間墨梅

昔年曾作梅花夢夢回衣上寒香重  
矮窗偶見一枝開  
早是江南春意動凡花不似梅之清  
精神骨相由天成  
屢從畫手細傳本但知刻畫非寫生  
官塘荒寺門斜掩  
歲久廊歌風雨颭不須晴雪明千堆  
賸喜墨痕留數點

潮詩

人身日夕何曾休血隨氣運長周流  
偶然逆轉背常理  
未免凝結成贅疣少年每誦海潮賦  
徑以人身為譬喻

君看沙漲潮頭回却向別流亂衝去攔不住潮頭從此  
失故步人身調養勿傷和潮汛緩來爭奈何

羣牛浴小港

羣牛見水身半濕水淺泥深踝全入搖頭擺尾緩緩游  
羣牛相呼卒未休牧童在旁短鞭指童既無言牛漸通  
人牛兩忘日自長水茫茫兮未蒼蒼

多稼亭

前年毘陵登多稼萬頃黃雲在亭下斷碑依壁毫髮微

擊壤老人歌聖化今年負承到會稽  
州園瓦影碧參差  
中有一亭容數客鬱鬱兩字標璇題  
吾聞國以民為本  
民向東郊事耕墾與民同樂識見  
高秋成沽酒來遊遨

山中老人送蕙花山荷葉因成長句

山中老人久不見忽然遇我清溪濱  
手把幽蕙數十本  
清香襲襲侵衣巾向來我曾著數語  
定是久閤蛛蝥塵  
老人詳說種蕙法泥酥沙軟水力平  
亂山深處少人跡  
斂藏不耀席上珍即今得登君子堂  
藹然能被天地仁

小盆別種山荷葉種時近水開晚春青青之色亭亭立  
似與巴豆為弟兄不然太華山頭種小變厥初翻樣新  
草木至微同是性出處一異虧本真老人前身恐是郭  
隨緣衣飯甘淡泊爾雅讀書吾未能聊為老人書大略

明月堂聞松風

此去中秋纔七日明月堂前秋可即山深水遠斷人蹤  
僧云居此探消息老松夭矯雙鳳翔翠色依月新凝光  
神仙所居無乃是我來訪古摩藓蒼夜長月正當窻白

風入松梢聲剗剗娥江元自通濤江脫似江潮撼僧牀  
君不見東坡先生豪一世寄語重門休便閉胸中吐出  
黃初詩詩勢如潮曼無比又不見后山居士真仙人每  
遇奇觀精神生悠悠江水流不盡晚日浮沈潮勢平披  
衣起坐寂無語松影參差復如故風聲四散不暫停遙  
見江流趁東去

簡曾舜卿

三十五日不見君今番寵訪又三旬喜君風度勝似舊

未暇取酒細論文西關之西蔣灣北隨分各有數間屋  
只待梅花摘索開共君清賞意自足

蘇李河梁相別圖

古人重交情初不分秦越詩句聯珠璣中心瑩日月何  
人作此圖筆墨已超絕因圖想當時交情重于別君不  
見朔風漠漠沙草寒子卿仗節歸漢班河梁執手不忍  
去安得同飛無羽翰

陶夢得弼袖詩見訪用元韻

大雅不作詩格變只今知誰傳妙手既愛虛飄狀風雲  
又愛雕鏤梧杞柳半生于此寓吾身曉吟夕鍛苦用心  
可憐汨汨逐外物未免漸漸虧天真我今久已乾面唾  
閉門政要深自坐春來織柳鶯弄聲秋至凋葉蛩相和  
牀頭一卷古人詩疾讀緩讀莫相疑君不見口耳之學  
求宗派不問血脉在不在

十里鋪歌

山容偏向秋深瘦轎行十里日將晝斜斜雁字雜真行

節節芙蓉攢錦繡向來頗恨日月遲而今翻道光陰驟  
是中有策君豈知心要清閒手長袖片言輕發潛禍機  
駟馬難追焉用救州家因旱授民詞差官下縣拯民饑  
嗟予竊粟慚一飽破裘短袂肩相隨君不見流行坎止  
言所寓初程且到十里鋪

雨後生涼絡緯聲清可愛

元蟬聲清入吾耳暑氣駸駸猶未已殘花挺挺留麝  
嬌態娉娉是荷婢偶然一雨雲紉裳池邊雨過風送涼



小蟲深集楊柳影一段笙歌清更長

東坡祠詩

先生筆端倖造化妙歲清名滿天下久知富貴等浮雲  
已悟世情同啖蔗置居陽羨山水妍湔滌埃塵聊稅駕  
豈知地主無所容天地雖寬如傳舍一朝焚券還其居  
意氣不迫愈閒暇年深此事竟莫傳欲紀詩篇愧陶謝  
先生祠堂幽且深今人那識古人心但把丹鉛較形似  
滿廊遺像成兒戲

象田老饋山茶用東坡先生韻奉寄

前時著脚清淨坊山童殷勤進山茗半杯春雲滿晴空  
午困曹騰頓能醒山深有鳥聲清圓俗名搗茶頗堪聽  
從來不起市朝想定亦久知存所性何如搗茶伴老衲  
疾病去盡竟歸正數株寒菊帶秋清一篆香烟留日永  
顧我服官走芳塵心雖超悟力未猛氣猿意馬難同防  
未免稍縱肆頑獷人言茶味怕齒知日漸月漬遣胃冷  
不然除膩立奇勳氣象森嚴費忠鯁建溪早芽細如鍼

來春喊聲徧山嶺銅模新製號鳳團絳紗斜紉護龍餅  
竹窻拂拭金石堅碾破霏霏光炯炯舊曾識此今罕見  
山茗一旗生舜井冠裳不加貌自若厥包斷不請僥倖  
須知老衲定中人任柳生肘木生癭

獨孤憲公檜

古人聲名期不朽一言之謬如此酒今人隨世就聲名  
浮雲變滅無不有詎知老杜可歎詩爭似憲公當陸奏  
文章遠繼商周作氣骨已逼秋山秀晚分符竹行其志

務在人民安猷畎仁聲既遠姓氏傳遺跡常存鬼神守  
老檜槎枒枝幹古參天黛色猶衝斗終然依附得聲名  
孰謂今人不如否

立冬後述情

山城並水寒較早駕瓦新霜寫花草五朝三朝風蕭蕭  
九日十日雲飄飄秋將歸去冬又至寒色不遮萬山翠  
小窻倚徙片時間有美人兮隔江水

田家歲晚

田家春米盛土倉祠竈新鱸鯉與魴粥分口數願長健  
不賣癡呆儂自當熱火照天田蠶好打灰如願從所禱  
一聲竹爆陽春回城裏看燈歸已曉我生把筆作耕鋤  
年餘三十腹空虛不如爾農隨分足只怕門前人催租

### 石人行

君不見深閨有女禮自防心事炯然並秋霜江頭日日  
望夫壻願身成石立道傍人傳其下多風雨天地默與  
之低昂靈犀一點磨不盡歷歲既遠名獨香因思萬物

皆歸寓獨許頑質加冠裳刻形肖貌此何態儼然如在  
端而莊惜哉愚俗竟莫儼翁媪同處天一方嗚呼翁媪  
計雖得胡不為柱支明堂

纂風浦

短茅黃瓦排門戶祖父從來在此住不思城市好風光  
只要秋成有分數年年借本事荒田探前望後庶有補  
海門相近潮吐吞不似今番難撐拄夏初幼婦生小孫  
嚶咿作聲求飼乳婦饑苦語出肝腸搖頭怕說纂風浦

喜雪童謠

屋上三日留乾雪添得人間訝奇絕不須待伴窘風雨  
只要呈祥了時節小兒戲拾疑是花舞低婆娑最堪誇  
最堪誇處漸堆積生寒到骨思歸家

雪飛不已戲作長歌

清溪怒號多北風乞水來自河伯宮多應飛雨作寒色  
呼吸雲氣鞭癡龍冬深萬木凍欲折那有卉藥成纖洪  
造化小兒一餉戲鍤瓊鏤玉何其工庭前婆娑萬花舞


春意已徧翡翠叢可憐世情多冷眼怨洛竟欲訟天工  
了知妙處不用力豈為汝輩眼目供明朝晴鳥耀燭龍  
向之幻景須臾空

止雪用東坡先生韻

常年有句吟雨葉今年只了吟飛雪社中誰是錦繡腸  
令我褫氣歎妙絕固知天運陰陽戾那問家園花草折  
逞妍妬舞費斑鏤幻色潛光亦消滅前時有句送渠歸  
日華搖金雲暗掣滕家娘子耽清游瑣碎回風到簾纈



只須頭次陣堂堂底用十番空屑屑民家束縵帶濕炊  
醉客糜金謾飛瞥海隱來徵鶴隱句恰如白佛偈重說  
昏霾未見天清明石炭擬鑄一寸鐵



--	--	--	--	--	--	--	--



■

■

■

# 欽定四庫全書

集部  
拙軒集卷三  
四

詳校官庶吉士<sub>臣</sub>陳若霖

主事<sub>臣</sub>呂雲棟覆勘

騰錄  
監生<sub>臣</sub>鄭啟緒  
騰錄  
監生<sub>臣</sub>尹大謙

欽定四庫全書

張氏拙軒集卷三

宋 張侃 撰

詩

梅

江梅有遠韻不與世浮沈  
誦我壁間句知渠歲晚心  
疎花生古意暖艷啁幽禽  
此處知誰解霜天啓角音

時雨三首

旬日風消雨今朝  
山出雲柳深開潤色  
荷靚匝清芬江

燕新調語沙鷗自引羣農人相賀語田畝可耕耘  
時雨催農事庭陰散午涼地寬平野色雲密闕林光送  
目孤村外舒情小艇旁斜暉猶返照何必問商羊  
矮屋原卑濕頽牆上古苔世間多少事眼下兩三杯詩  
卷無人惜涼船有客來明朝梅已斷只是一聲雷

游西湖李氏園池

湖水平春色名園接香微輕風生翠影細雨醒香霏意  
足休嫌野身閒不受鞿隔舟多妓女歌逐片雲飛

歸鴈亭逢所知

歸鴈亭前別于今又五年水深涵落日春晚尚餘妍把  
酒聽吳曲浮家入楚天秋風遞消息為問有書傳

黃龍洞

傳道黃龍穴深藏不測淵翠藤依壽木石壁隔塵緣恐  
有神仙分來觀古洞天善權知不遠雙鶴舞胎仙

何道兩山

兩山青不盡吾眼未曾經問法維摩室留名處士星地



深藏白霧天遠納蒼冥我亦倦游者何時結草亭

秀州城外

月色明于晝閒登百步橋天低雲宿野地遠水通潮吹  
笛回賓鴈彎弓絆落鵬年來無片善所得是風標

初秋夜坐

酷暑秋仍有臨流興未忘好風吹過雨午夜得新涼促  
織聲偏細春鋤立自雙人生隨處好最好是家鄉

夜深天籟息露重月華新此去何須懶從來只任真入

秋山有色積雨水生蘆萬事乘除耳一樽聊可親

雨

傍海風先冷殘秋雨漸疎柳凋閒搏黍水淨見春鋤游  
客惟筇竹民家半草居近時潮候訊玉筍當園蔬

明心院

村東古蘭若門徑久荒涼鸛舞舞風幡小蛩吟露葉黃潮  
音隨法轉茗盃怕詩忙一片牆根石無人為發揚

嘲絡緯

時序方中伏簷前絡緯鳴涼風雖暫至秋氣未全清荷  
葉綠偏斷芙蓉錦漸成勸渠莫多事促織又司衡

中夜起坐納涼

風迅中宵起簷虛入戶涼一輪明月影八尺綠筠牀久  
望重梅雨閒尋晚芰香天河漸分曉結語問牛郎

趙紫芝詩卷

天樂無他好精神盡在詩墓藏山色遠語到水心知名  
極天還妬身亡道自垂勿嫌官職小君復鶴相隨

周晉仙詩卷

晉仙新寺住曉夕在吟邊相去二三里聞名五七年西  
湖聽鴈夜雪水釣魚天語逸山精泣宜為萬古傳

柳下詩卷

退之名振世無本肯從游既以吾儒重方知異說休不  
才空剩語馳譽勝荒丘朴老深于律遺篇處處留

偶成

細雨遲春色閒雲接曉天清時依薄宦秀句近華牋地

冷梅枝少川明竹影圓  
翻思年少日折柳繫漁船

花事

立春踰十日猶未見芳菲  
雲葉垂垂滿簷絲緩緩飛  
池魚寒未上林鴈暖方歸  
因靜無思慮由人論瘠肥

芍藥

春意垂垂盡名花續續開  
誰知傾國色元未著香埃  
曾向蕪城見還驚茗水來  
貪看詩律細忘覆掌中杯

春盡

韶光餘十日明歲又重來柳外黃鸝怨山中杜宇催一  
番風送雨幾處錦成堆且飲深杯酒攜筇緩緩回

隱者

山蹊通綫道舊有隱人居生計多歲年秋盤近薦魚簷  
牙松得壽籬角草堪鋤只欲逢熙運誰能更上書

雨後

雨後秋容穉雲游日色微遠山依舊瘦汙水已新肥燕  
子稀踈舞螢光冷淡飛官閒清到骨無是亦無非

秋色

野闊因秋見山高入霧微曉看天色暝午更宿陰園有  
地堪容隱無言且息機為知閒處好不是厭輕肥

夜宿

舟宿隄邊寺天虛露氣清秋從今夜冷月比舊時明水  
鳥紛紛下墟煙冉冉輕田家生計好不逐世間名

家園夜月

荒畦多古木月送影婆娑須信閒中好翻嫌塵事多簷

低排遠岫堂近俯清波夜靜頻來往漁樵互奏歌

來鴈

雲外新來鴈風回字倒看深知吳地暖生怕塞天寒水國沙汀遠西疇稻粒殘排羣宜穩睡報夜喜平安

宵征

澗遠泉聲激山回月影重宵征滿涼意曉色帶秋容衣薄初霑露橋陰久傍松茅簷因雨濕催織是鳴蛩

伯牙瀆



古賢真好事，瀆以伯牙名。岸轉天無盡，春回草漸榮。  
當年流水曲，今日賦詩情。可惜知音少，令人恨未平。

張涇漚

我聞尋勝槩，人自號荒郊。木老含生意，橋迂接水坳。  
浴鳧歸艇集，戲蝶野花梢。汎宅吾宗遠，虛勞歎繫匏。

穀日

姬旦陳王業，農官報歲功。新晴春滿野，宿霧曉披空。  
賣卜煩鄰叟，知時訪老翁。更須圖夕雨，土脉盡豐融。

欲識田家趣清溪曲抱村齊民當日術學稼古人言瑞  
實歸千室餘功到小園元機亭育際始見道尤尊

夜宿育王莊北窻

破壁排矮窻新簷出粉牆開尊侵綠色得雨借初涼名  
保千年在身安萬念忘詩情亦漫興何暇細商量

再用韻促季文結水邊亭

一朝飛驥足十載歎龜藏臨水軒亭好逢人笑語涼須  
先心地遠莫厭斧聲忙未數漳南景裁詩拂蘚蒼

宋劉  
繪張

融周顒一時勝士居皆連牆故朝野為之語曰三人共  
宅夾清漳張南周北劉中央舜卿與朱季文盧子長並  
居故云

寄題富沙倅解靜涼亭詩

南中多暑氣來覓靜涼詩但得政無擾自然民不欺亭  
中人蘊藉欄外水漣漪想見賓朋過銜杯樂聖時

和朱季文即事

種竹多臨水山隨雲影歲夏深元有暑秋淺未全涼箇  
箇飛螢入雙雙歸燕忙幾年觀物理不復叩員蒼

將歸

將歸浮小艇水色綠添痕楊柳迷低岸鶯花滿舊園日  
長迎雨燕沙暖起風鴛眼界須當闊臨溪築小軒

歲晚

水斂風生壑雲深雪滿天寒光憐袖薄瑞色向梅妍淺  
酌生春酒犇牛酒名閒賡餽歲篇吹燈看家信獨步到牕前

拙軒偶書三首

歸來開一室復以拙為名道在何妨小身閒不用榮柳

絲愁斷續花靨笑輕盈只此觀天運逢時物自成  
廊深人罕到益友兩三人得意文章妙相忘情味真蜂  
來窺硯水燕去潤香芹如此逍遙過胸中無點塵  
侵晨門外立山色已浮春斫竹流溪水提籃擇細鱗柳  
濃將作絮梅小未生仁自拆紅泥酒歌呼到北鄰

足軒詩

人爵何須戀翛然郭外居隨緣常二滿散帙富三餘  
石梅花賦堆庭柿葉書呼兒邀客至反櫂或巾車

定軒詩

門前流水競洗盡市塵交秉我中心正從渠異說繞向  
來多肘柳近已去心茅隱几觀天地晨曦動翠梢

十月初五日自白門之丹陽宿於驛亭中是夕

風雪大作

輾轉耿不寐青燈遙夜闌關河千里遠風雪一牕寒旅  
食腰圍減征鞍髀肉酸想知雙鶴髮朝夕望平安

感昔

先君年壯日邂逅鄭當時把酒對今月彈琴論古詩眼  
前多俗韻徽外少人知除却瑤山老無繇訪斷碑先君訪璉市鄭參議之子次修論穎師彈琴詩甲戌春游瑤山寺逢一老僧備說論詩時事因得斷碑所載

正月尾雪

今歲春來晚晴寒比舊添雲深天欲雪風定瓦堆鹽幽  
艷迷瓊屑前山隱翠尖詩人疑是瑞就喚野人占

觀蘇林堂帖

功名落落俟天時險阻艱難定漢基老子掛冠從早歲

諸公頌德盡良規  
既知中夏馳清譽  
合去鄉林賦好詩  
事到百年方始定  
晴牕細與拂烏絲

胡文定以扶持  
三綱推許向公

### 新晴

披披雲陣從東去  
薄薄晨光向北開  
花態最嬌依宿靄  
柳枝無力輓香埃  
心清更覺虛簷遠  
事少緣無俗客來  
野鳥互吟閒自在  
三三兩兩啄莓苔

### 夜坐

青燈點粟伴牕幽  
檢盡詩篇倦即休  
萬事如雲同舞燕



此心似水羨飛鷗客來不過談閒事我壯須當辦小舟  
雨雜風聲欺客枕清眠無夢兩悠悠

久雨

今年梅雨已淋漓梅盡多時雨意癡漫說池荷能潤色  
豈知岸柳亦顰眉一天黯黯雲陰殢六月清涼客子宜  
兀坐小樓香半綫紛紜萬事只心知

梁湖夜望

秋帶涼風葉互鳴風隨潮汐候時生導源甚遠紋微起

乘勢初來花轉輕白鷺幾枝閒可畫晴山數點曉猶明  
偶來又得詩中計久矣難成五字城

和中秋韻

月魄詩魂兩鬪清却嫌歌管揭危亭遙知山鬼形難遯  
誰洗天公眼暫明物外風光何晶晶人間燭火謾熒熒  
酒狂徑欲騎鯨去一拂鴻蒙散宵冥

奉寄曾舜卿二首

我與懶翁非淺交向來寓止在西郊繞庭草際綠浮色

滿檻花梢紅解苞，只要同心勝膠漆。豈緣一字倩推敲，  
四年會面休深歎。辛苦揚雄述解嘲。

一幅吳牋秋滿天，幾回書字欠人傳。知君性懶存吾道，  
顧我官閒只舊年。詩句鍊成猶未穩，酒杯空泛未曾傳。  
庭前栢子西來意，近日能明若箇禪。

寄曾兄

富貴功名莫問渠，閒中氣味復何如。年來格外添新句，  
夜靜燈前理舊書。用拙不妨存我性，得時未免駕高車。

君家文獻人難比會見芳名上玉除

次王子元韻二首

眼看珠玉混泥塗奇貨何人解與居賣劍買牛知已晚  
壞車殺馬計何踈卑飛莫辨雞羣鶴高義難兼熊掌魚  
却羨臨川王介甫愛君獨上萬言書

皮骨三年走道塗移文良負北山居甘貧我固輕諸阮  
勇退吾猶恥二疏好著短衣看射虎休彈長劍為無魚  
人生識字多憂患飽睡從今莫讀書

用秦少游韻二首

春風花草繡林舉索莫誰憐止酒陶晚學文章真末技  
早知州縣亦徒勞年光可歎石中火人事休磨笑裏刀  
分外更須貪富貴如求兔角與龜毛

未工射雉怯如舉欲掛衣冠慕老陶莫為功名多戚戚  
須知身世兩勞勞求魚切戒空緣木買犢不妨先賣刀  
未有田園作歸計年來留滯感潘毛

戲用東坡先生韻二首

冠世文章李翰林掀天功業漢淮陰抹靴捧硯榮雖甚  
受鉞登壇眷益深遠竄夜郎揮老淚生擒雲夢負初心  
窮泉二子應追恨不解君前早脫簪

倦看冠蓋鬧如林夢想扁舟破晚陰步月南樓情不淺  
臥風北牖味殊深朱旂黃紙非吾事木板青衫負壯心  
游宦半生成底事鬢絲零落不勝簪

豚犬夜誦東坡贈王子直詩堅索次韻余率然  
成章可笑深不自量也

年來典盡鸛鷖裘遠宦深慚馬少游痛哭恨無裨國論  
偷安終不為身謀誰憐饑虎空搖尾却羨寒龜暗縮頭  
但得渭川千畝竹也勝霜鬢取封侯

田元長和煙字韻詩見寄復用前韻

幾年無夢到凌煙身似春蠶已再眠寡合荆人和白雪  
獨醒蜀道上青天漁樵好去任爭席富貴儻來羞執鞭  
見說高真足官府不妨長作地行仙

用文伯起韻

老人癡鈍性可憎微子誰與為友朋久廢未容收穎馬  
一呼寧復責饑鷹無緣下榻留徐孺好去登門訪李膺  
吾道不行吾已矣短桴浮海要同乘

和曾舜卿秋日偶成

久無名酒共君傾靜對溪山悅我情雨沁荷花多退色  
風穿梧葉強成聲乾坤納納從來大歲月堂堂未用驚  
甚欲著書傳後世只愁議論太平平

樓源清叔舊有詩云樹冷鴉啼月天寒鴈帶雲



曾舜卿足成四韻又有詠雪詩云來從天外無  
非雨散在人間盡是花亦佳句也清叔死已數  
月因用後二句為詩弔之

見說樓君用志佳曾吟雪句被人誇來從天外無非雨  
散在人間盡是花偶到銅陵尋舊友歸由宣郡棄生涯  
碧雲暮合愁偏聚孤塚纍纍日易斜

甬東

侵晨風雨闌城樓渺渺蒲帆海盡頭遠景暫煩雙目送

清游不負此生謀  
半杯綠蟻衝寒色  
幾箇白鷗分客愁  
相近梅開遲雪舞  
肯容興盡剡溪舟

池邊

簿書才了聽蜂衙  
閒到池邊景漸佳  
雲亦有心時散影  
風都無力晚生花  
勞神空覓三年艾  
妄想休乘八月槎  
睡思全清還解否  
歛瓶新淪建溪茶

書考

二年薄宦在金臺  
牆角雙扉向晚開  
罕有金貂來換酒

且看野馬共浮埃已書下考甘平進久律吾身愧不才  
却喜清貧如昨日知心相識自然來

負丞虞水恰年餘誰信官居似野居乍起柳風清午枕  
久因梅雨理殘書眼前毀譽何須較酒裏功名定不虛  
只把廉勤替疏拙翻嫌苦苦學懸魚

紅梅

天然標致出羣品綠葉青枝說太狂卯酒醺酣紅玉軟  
春風觸撥瑞龍香清臞尚餘山澤相淡薄強隨時世粧

更道北人初不識杏花應不敢承當

春時

兩日閒為汗漫游谿邊長是喚扁舟  
杯盤草草同真率  
笑語悠悠得細酬  
別墅橋欹泥沒膝  
東園亭小雨霑頭  
記一時實事  
不知桃李都開遍  
更趁殘花一醉休

雨

一片雲飛雨趁來  
常年此候捷如雷  
滿天盡黑都吹散  
俄頃還明又復回  
準擬却無真失望  
等閒易有竟難猜

化工若念農辛苦早賜傾盆亦快哉

巧夕前一日雨

天時人事逐番新轉盼初秋感慨頻月傍銀河移扇影  
天留絲雨洗香塵民間但欲逢豐歲酒裏何妨換好春  
一笑且隨吾意適燕支菱芡伴盤珍

偶書

事業從教下瀧舠一年竊祿在江皋腥汙砧几憎蠅賦  
愛護文書却鼠刀風約浮萍雲疊岫日歲老檣雨翻濤

深慚無補公家事只願年豐弓載橐

聞方孚若

信孺

寺丞計二首

清時補外駕朱轡德政碑成達帝閣都把功名垂竹帛  
盡留官職付兒孫生前花藥千株在身後詞章幾卷存  
履道宅邊雲黯黯知誰挂劍酹清尊

憶昨家君出帥時惟公英氣少人知要除五事心常在  
費盡千言氣不早渺渺淮波紛擢檄晶晶霜日照旌旗  
論功未盡還知否應有名賢為立碑

收潘廷亨達訊

舊年淞右水連天聞說閩中水亦然官裏勸分雖遍及  
民間慳糴為無錢大風拔木揚塵土細雨打花空媚妍  
甲子一晴差可喜農家只願屢豐年

題蕭照漁樵對語圖

世人大半愛漁樵不道漁樵心志凋漫釣溪魚臨月夕  
每沽村酒怕霜朝檀欒男女衣藍縷澹泊生涯舟蕩搖  
偷得片時相對語從頭至尾盡無聊

閒中憶曾舜卿知丞

官舍如舟近古河，隔河老木尚新栽。  
森羅星象螢分度，經緯水紋魚擲梭。  
月滿秋容隨處好，風含涼意向人多。  
香蒲泉石供清翫，遙憶騷翁在澗阿。

宿等慈僧房

小小禪房若箇寬，氍毹中楮帳護幽閒。  
貪看天外雲千變，忘數簷前竹幾竿。  
老衲呪經祈雨切，臞翁煮粥當晨餐。  
早知一念能持靜，不學槐安蟻走盤。



姑惡

一雙姑惡屋邊啼飛入垂楊伴夕暉不悟形骸非昔日  
但思怨恨沒休期婦聞嫺語猶翻悔汝得佳名免此譏  
事事直須存分義從今緘口莫相疑

冬晚

冬晴日暖如春天墨雲忽過雨生寒定飛柳絮呈農瑞  
未放梅花到酒樽歷尾無多更舊歲筆端不韻祇陳言  
須臾刮地風聲壯吹折南牆老竹根

按寒字  
出韻

冬後書事

兀坐茅簷意自閒  
哦詩因得數苔斑  
一番雨過歸寒水  
數片雲浮疊晚山  
近日陰晴多不定  
自來冷暖不相關  
春深泛棹清溪上  
穩釣漁村三兩灣

天機詩

汎觀物理任天機  
莫泥春殘事遽非  
蝶粉鶯衣陰處泊  
燕泥鷗雪雨中歸  
裝成閒景真堪翫  
寫入清吟細解圍  
一榻涼風清午暑  
拙翁睡起理絺衣

金方先生集卷三  
同鄉人別朱希文察判于詠春亭

今春醵飲咏春亭水閣山遙眼界清  
前度來時多值雨  
今番到此却逢晴  
蠶方三幼餐乾葉  
燕喜雙飛泊短楹  
小別諸君休作惡  
陽關四疊不須成

家園二首

當年迂叟圃初成  
野草閒花不記名  
康節巾車臨小徑  
東坡詩板照高楹  
久知氣象歸前輩  
擬學規模愧後生  
惟有至公能格物  
莫將險躁起心兵

堪笑吾家五畝園新添石岸築雲軒眼看流水清無底  
面揖羣山翠欲奔拂拂好風涼入座娟娟明月影侵門  
弟兄歲晚團樂處自摘青蔬薦酒尊

次韻韋中實

閨雨悶

與世相違願不才春殘花底尚銜杯詩從碧霧愁邊得  
門向青山好處開東里沈君投檄去西鄰韋叟趁閒來  
喜無俗駕知予懶坐看庭陰閨古槐

偶成

前朝晴暖昨朝寒細雨催花聲不閒處處閉門掃蠶蟻  
家家垂柳隱絲蠻東灣泛艇看人渡北埭扶筇向晚還  
惟有羣山怕陳迹輕煙冉冉薄螺鬟

虛庭

虛庭幽閨日陰移旋拂藤牀近小池雲自悠揚峰疊疊  
風常和暖日漪漪青衫漫仕安愚分白酒初芻滿屈卮  
竹外流螢三兩箇微光猶足映書帷

西村

籃輿輒輒過西村小麥青青雨露恩山色無窮開遠近  
民家守分度昕昏僧精持課歸林下客自攜尊醉竹根  
每日塵氛牽百念要須結屋浸溪痕

南村

郁李花開春漸殘海棠猶自映杯杆燕隨風舞迎人暖  
鳩喚雨來連夜寒兩水中分清可燭

上陌澗水一自石  
瀨一自白竹鳩合

流自青林廟  
前匯入湘溪

羣山環揖秀堪餐兒童成隊逢寒食紙剪

飛鳶貼霧端

病起

秋深雨意轉連綿聲到枯荷清未眠久悟是非姑掩卷  
且看童稚互攤錢園蔬土潤青堪饌徑竹行疎翠可憐  
賸喜病夫今已健碧腴膏莫問人傳

元微之病瘴白樂天自長安寄碧腴

膏

象山住持僧于修求詩戲題五十六字

的知前聖定曾來山脉深長景漸開霜幹都無新氣象  
風幡不染舊塵埃漁樵雖過何嘗問父老相傳莫浪猜

慚愧修公堅有請依前題作小天台

催雪次韻韋中實

海隱方搜催雪詩  
韋郎落筆補新辭  
雲邊花舞瓊千點  
座上風流玉一枝  
如許寒光宜應瑞  
不勝幻色又添奇  
政須淪茗清靈府  
盡把文章潤色之

費補之謂中實云  
古人有催雪詞未

有作催雪詩中實賦此詩  
時雪已舞花故終篇及之

溪上

水痕依綠四無邊  
雨脚垂簷細更妍  
楊柳不遮愁處眼



牡丹猶倚醉時肩紛紛燈火疑星爆汨汨聲名類蟻旋  
閒凭蓬牕仍感舊開箱重為整詩篇